



Jumat, 26 Januari 2024

Ogen: Lukas 19:1,2



Kepala Pengalo Cukai



Cukai, e me pajak si itetapken pemerintah si jadi tanggung jawab si mada barang, si itukurna i negara entah i kota si deban nari. I bahan pajakna gelah lit pengawasen barang si masuk ku negaranta bage pe si ndarat i bas negaranta nari. Termasuk i je pemeriksan dokumentasi barang si masuk ras sindarat. I bas ngaturken pengawasen e tentu lit bidang-bidangna janah lit ka kepalana. Tujunna situhuna gelah stabil perekonomian negara. I bas Pustaka pe lit tersinget kerna cukai. E me pajak si itentukan pemerintah guna igalari rakyat si rusaha i pasar-pasar, subuk usaha kitik, menengah entah usaha mbelin. Pemerintah netapken petugasna si ngutip seh ku Masyarakat. I bas kerina si ngutip e lit kepalana, igelari kepala pengalo cukai. Kepala pengalo cuke e emepulung kerina pajak rakyat, e maka isetorna ku pemerintah sada bagin rikutken ketentun si enggo ibahan. Silebihna e enggo jadi sikerajangenna.

Enterem kalak si rate segat nandangi kepala pengalo cuke enda erkiteken perbahanenna. La sue si ikutipna ras si itentukan pemerintah. Buatna ka upahna arah pengutipen e nari, amin pe situhuna enggo lit gaji ibereken pemerintah man bana arah pendahinna e. Lit kesanna `memeras,' rakyat. Erkiteken kepala pengalu cuke enda erteman ras pemerintah Roma, la tempa lit ukumen kai pe inereken man bana. E maka ertambah-tambah ate kalak Jahudi mbukbukna man bana. Enggo ka korupsi, kaki tangan pemerintah Roma ka. Em negara si engkuasai Jerusalem paksa si e.

Selaku kepala bea cukai, arusna ngukurken pengelolaan ekonomi gelah sejahtera rakyat, gelah ergiah-giah ukur rakyat e erdahin. Iperjuangkenna rendah pajak Masyarakat guna penambahan modalna, janah meherga akapna tep tep rakyat si mereken pajakna. Arusna kepala pengalo cuke jadi teman rakyat, mereken motivasi semangat laku rusaha. Selaku teman pengalo cuke tetap mbela rakyat, ras mereken serpang puluh.